



Buletin

ACIS

Jamadilakhir- Rejab 1443/ Februari 2022



Semangat
KESUKARELAWANAN
Bantu Membangunkan
Kepimpinan Mahasiswa
Pasca-Pandemik



Semangat **Kesukarelawanan** Bantu Membangunkan **Kepimpinan** **Mahasiswa Pasca-Pandemik**

Oleh:

Nur Dayana Balqis binti Norul Azizi

Exco Pembangunan Mahasiswa, Majlis Perwakilan Pelajar UiTM Cawangan Negeri Sembilan Kampus Seremban Sesi 2021/2022

Nurul Nisha binti Mohd Shah

Ketua Unit Kepimpinan Pelajar, UiTM Cawangan Negeri Sembilan

Mahasiswa dalam ilmu pendidikan ialah individu yang sedang menuntut ilmu di peringkat pembelajaran yang lebih tinggi seperti di universiti. Mereka dilihat sebagai insan yang mempunyai daya berfikir yang tinggi, kemampuan berfikir secara kritis dan mampu berfikir dengan cepat sebelum bertindak, sekali gus memainkan peranan sebagai penerus budaya kesjaranaan dalam masyarakat.

Oleh itu, mahasiswa hari ini yang merupakan pemimpin masa hadapan perlu menimba ilmu, menyerlahkan idea dan pandangan mereka dengan cara melibatkan diri dengan membantu dan menyelami kesukaran hidup rakyat, membantu sebaik mungkin dalam menaikkan taraf hidup mereka dan masyarakat, seterusnya meneraju kesejahteraan negara pada masa hadapan. Akal budi mahasiswa turut dilihat sebagai cerminan sahsiah dan akhlak dalam membangunkan generasi muda. Sudah terang lagi bersuluh bahawa mahasiswa bukan hanya memberikan impak kepada lingkungan mereka, bahkan turut menjadi inspirasi kepada kemajuan bangsa.

Mahasiswa sebagai agen perubahan harus memiliki tekad dan semangat yang kuat untuk menjana transformasi ke arah yang lebih baik. Menanamkan nilai positif dalam diri sendiri merupakan langkah awal untuk memberikan sumbangan kepada orang lain. Perubahan ini digarap melalui pengetahuan, keterampilan dan idea kreatif. Mahasiswa juga menjadi penanda aras kepada kelangsungan hidup masyarakat. Wahana yang paling utama dalam kalangan mahasiswa pula adalah kelompok kepimpinan mahasiswa. Kepimpinan mahasiswa adalah platform terbaik untuk melakukan pelbagai aktiviti berimpak tinggi kepada masyarakat. Namun, era kepimpinan mahasiswa kini disifatkan sebagai satu era kepimpinan yang cukup berbeza berbanding sebelum ini susulan daripada negara berhadapan dengan pandemik Covid-19.

Dalam norma baharu ini, daya kepimpinan mahasiswa di segenap institut pengajian tinggi awam mahupun swasta menuntut kepada kepimpinan yang luar biasa bagi membolehkan pemimpin masa hadapan ini kekal relevan. Mahasiswa perlu bijak mengatur strategi dalam mencapai kecemerlangan akademik dan kemahiran interpersonal (*soft skill*) untuk perkembangan mahasiswa yang holistik. Keseimbangan ini akan menjadi faktor utama pemilihan majikan dan organisasi kerjaya masa hadapan. Mahasiswa yang aktif dalam aktiviti khidmat sosial mempunyai nilai tambah untuk mereka menceburi alam pekerjaan yang sebenar. Kelebihan mahasiswa yang cenderung dan



aktif dalam pelbagai aktiviti khidmat sosial ini dilihat mempunyai nilai kemanusiaan yang tinggi, daya kepimpinan yang ampuh, semangat kerjasama yang baik dan memiliki sikap toleransi. Semua pihak perlu memainkan peranan dalam usaha memperluaskan kegiatan kesukarelawanan dalam kalangan mahasiswa ini.

Bukan sahaja minda mahasiswa yang perlu berubah, malah transformasi minda secara konsisten dengan menyediakan ruang dan peluang yang luas serta dana yang mencukupi oleh pihak kerajaan dan swasta, institusi-institusi pengajian, badan-badan bukan kerajaan serta komuniti turut diperlukan. Mahasiswa yang bertindak sebagai sukarelawan pada kebiasaannya akan lebih telus memberikan kritikan, saranan dan solusi ketika terdapat hal yang tidak sesuai dengan nilai luhur dan cita-cita bangsa. Dengan keaktifan mahasiswa, diharapkan kepimpinan mereka turut memiliki kebijaksanaan bahkan mereka perlu kompeten dan berkualiti. Semangat kesukarelawanan melalui pelbagai bentuk khidmat sosial secara sukarela kini giat dijalankan di peringkat global.

Di Malaysia, penglibatan mahasiswa dalam menggembeng tenaga sebagai sukarelawan ini telah membuka mata pelbagai pihak atas usaha yang disumbangkan kepada masyarakat setempat mahupun di peringkat antarabangsa.

Tahun 2020, warga dunia diuji dengan pelbagai musibah, begitu juga negara kita Malaysia. Selain bencana seperti banjir, ribut, tanah runtuh, kita turut menyaksikan COVID-19 menggoyahkan keamanan sarwajagat. Di saat kritikal ini, sifat kesukarelawanan menjadi tuntutan terpuji dalam masyarakat. Tanggungjawab mahasiswa bukan hanya menuntut ilmu, mahasiswa turut dididik di universiti menerusi pelbagai program kesukarelawanan dalam dan luar kampus termasuk di luar negara. Penglibatan sebegitu juga menumbuhkan semangat cintakan negara dan menghargai nikmat kurniaan Ilahi.



Kesukarelawanan merupakan sebuah cara yang mudah dan seronok dalam meneroka minat dan keinginan. Semasa melakukan kerja-kerja sukarela, secara tidak langsung membuka peluang bagi kita untuk merasai makna di sebalik setiap tugas yang dilakukan. Kesukarelawanan membantu individu untuk membina keyakinan diri sebagai contoh apabila di suatu kawasan telah ditimpa bencana, para sukarelawan bersedia untuk memberi bantuan. Hal ini akan melahirkan sukarelawan yang berkualiti dan percaya diri. Kesukarelawanan memberikan seseorang motivasi dan visi yang dapat diperbaharui yang mampu memberi kesan secara individu terhadap kehidupan. Tuntasnya, ciri-ciri kepimpinan akan tumbuh secara sendiri dalam diri dan merupakan citra bahawa kesukarelawanan mempunyai nilai peribadi yang menginspirasi orang lain untuk melakukan perubahan meskipun dimulakan dengan sebuah kebaikan yang kecil.

Kesukarelawanan harus menjadi identiti mahasiswa. Mahasiswa merupakan golongan berpendidikan tinggi yang mampu menjadi contoh terbaik kepada masyarakat. Hal ini merupakan modal sosial yang apabila dikembangkan dengan baik akan membantu membangun kompetensi sumber daya manusia (SDM) yang lebih baik, mengubah struktur masyarakat ke arah yang lebih berdaya maju, menciptakan pengurusan sosial yang lebih sihat dan kepimpinan sosial serta politik yang mengutamakan kemajuan di segenap peringkat. Sebagai konsep yang diterima sebagai kearifan lokal dan tradisi yang diwariskan antara generasi, kesukarelawanan bertransformasi mengikut perubahan zaman, globalisasi, konflik sosial dan politik. Prinsip dasar sukarelawan tidak berubah iaitu menggerakkan solidariti sosial dan menciptakan kohesi sosial dalam kehidupan bangsa yang akan terus relevan untuk diterapkan. Elemen ini jika

diwarisi oleh pimpinan masa depan negara ini nanti, pastinya akan tumbuh pemimpin generasi baru yang berminda global tetapi tetap berpaksikan bumi tercinta ini.

Inisiatif sukarelawan mahasiswa membantu warga yang terkesan pasca pandemik ini baik aspek kesihatan mahupun pasarana dan ekonomi sebenarnya didorong oleh rasa empati, solidariti dan semangat kolektif yang telah muncul sejak di awal fasa pandemik. Tenaga dan dana yang mereka hulurkan meninggalkan impak yang amat besar kepada setiap organisasi. Hal ini menunjukkan betapa para mahasiswa ini mampu mengorganisasi sesuatu perkara dalam apa-apa situasi sekali pun. Selain meningkatkan rasa kepuasan dalam diri masing-masing, bantuan yang dihulurkan dapat meningkatkan rasa kepuasan dalam diri yang akhirnya merangsang minda untuk menjadi mahasiswa yang lebih cergas dan cerdas. Bukan itu sahaja, menyertai kesukarelawanan mahasiswa merupakan langkah bijak dalam usaha meningkatkan jaringan dan jalinan sosial. Melalui kutipan bantuan dana, bantuan tenaga, perkongsian ilmu dan pemindahan teknologi usaha murni ini sekaligus dapat menerapkan hubungan yang lebih positif di antara mahasiswa dan komuniti di peringkat tempatan mahupun global dengan wujudnya sikap kerjasama, kepercayaan dan rasa hormat yang tinggi.

Lantaran itu, menerusi aktiviti kesukarelawanan, kehebatan kepimpinan, keterampilan, pemikiran, pengorbanan, keperibadian dan keberanian mahasiswa boleh dijadikan sebagai contoh kepada masyarakat. Sedar atau tidak, mahasiswa harus diperkukuhkan secara holistik dalam menjalankan tanggungjawab dan harapan dalam menguruskan keserjanaan ilmu dan keterampilan sahsiah dari pelbagai aspek seperti kecemerlangan jasmani, emosi, rohani dan intelek. Melalui kesukarelawanan ini harus diingat jatuh bangunnya generasi mendatang adalah impak terbesar dari generasi yang sedang kita bentuk kini. Keintelektualan dan kehebatan budi pekerti wajar dibina dan dilatih dengan inovatif agar mampu mengadaptasi sepenuhnya ciri kepimpinan dalam semua tindakan memandangkan mereka adalah peneraju kepimpinan negara pada hari esok.

